



Protocol dalla radunonza communal nr. 1-2026 dils 15-06-2026

Votants presents:	32
En procent:	3.84 %
Absolut pli:	17
Liug dalla radunonza:	Cumpadials
Perstgisas:	Geraua Cornelia Cathomas, deputau Fabian Collenberg

1. 0110.02 Avertura e beinvegni

President communal Patrick Schaniel constatescha che la radunonza communal ei cumpetenta da decider. Ella ei vegnida convocada tenor art. 31 dalla costituziun communal. Il president communal declara la radunonza da vischnaunca per aviarta. La gliesta da tractandas, publicada el FUS, vegn approbada senza objecziuns e vala sco ligionta.

2. 0110.02 Elecziun da 2 dumbravuschs

Sco dumbravuschs tier la radunonza communal vegnan ils convischins Robert Candinas e Vitus Collenberg proponi e tscharni senza cuntervuschs.

3. 0110.02 Protocol dalla davosa radunonza communal dils 16-12-2025

Il protocol ei staus exponius public e disponibels sin la pagina d'internet naven dils 16-01-2026 duront 30 dis. Duront il temps d'exposiziun ein neginas protestas enviers il protocol vegnidas inoltradas. Il protocol ei consequentamein approbaus.

4. 9202.01 Rendaquen 2025

Responsabel: President communal

Il quen da gudogn e sperdita per igl onn 2025 siara cun in cashflow da frs. 2'805'652.-- Suentar amortisaziuns ordinarias da frs. 611'659.-- (incl. amortisaziun canalisaziun e providiment d'aua) resulta in avanzament da frs. 177'918.--. Ils principis d'amortisaziun tenor model da quen ein risguardai.

Quen da gudogn e sperdita

Il canzlist communal presenta il quen da gudogn e sperdita.

Il resultat dil quen da menaschi siara pli favoreivel che budgetau. Il quen da gudogn e sperdita siara cun expensas da frs. 11'220'688.-- visavi entradas da frs. 11'398'607.-- che munta in surpli d'entradas da frs. 177'918.--.

Muort il favoreivel quen ed en vesta als projects che spetgan vegn fatg suandonts deposits en prefinanziaziuns:

- frs. 100'000.-- per introducziun cudisch funsil federal
- frs. 100'000.-- per la sanaziun plaz Cadruvi e nova tualetta publica, Rabiuis
- frs. 160'000.-- per la sanaziun dalla Via Quadras Sut, Sumvitg
- frs. 50'000.-- per la construcziun dalla Via Calvadi-Tuor, Sumvitg
- frs. 200'000.-- per la sanaziun dalla Via Marias, Rabiuis
- frs. 50'000.-- per il niev reservuar d'aua Chischnès
- frs. 400'000.-- per la sanaziun dalla Via Val (Runcahéz)
- frs. 150'000.-- per la sanaziun dalla Via Val (Acla Mulin)
- frs. 120'000.-- per il remplazzament d'ina maschina veglia
- frs. 400'000.-- per il project Lag Salischinas

Sligiar prefinanziaziuns:

- frs. 100'000.-- sanaziun tegia d'alp Runé

Quen d'investiziun

Il president communal presenta il quen d'investiziun.

Las investiziuns totalas muntan frs. 3'888'332.-- en cumparegliaziun cun in recav da contribuziuns da frs. 2'143'707.--. Aschia seresultan investiziuns nettas da frs. 1'744'625.--. Damai ch'il cashflow ei pli gronds che las investiziuns nettas sedat ei in grad d'atgna finanziaziun da 155 % che munta in surpli da finanziaziun da frs. 1'061'028.--.

Quen dalla meglieraziun Sumvitg

Il canzlist communal presenta il quen dalla meglieraziun Sumvitg.

Il quen dalla meglieraziun Sumvitg siara cun in surpli d'expensas da frs. 109'374.-- e quei tier entradas da frs. 528'991.-- visavi expensas da frs. 638'365.--.

Il capital agen pils 31-12-2025 munta frs. -32'564.--. Entochen ils 31-12-2025 ha la meglieraziun investau frs. 17'641'017.-- el project. Las activas per il davos digl onn muntan frs. 286'653.--.

5. 9202.01 Rapport dils revisurs ed approvaziun dil quen annual 2025

Responsabel: President communal

Conform als art. 47 - 51 dalla constituziun communal ha la cumissiun da quen e gestiun controllau il quen communal 2025 incl. il quen dalla meglieraziun funsila ed examinau la gestiun dil menaschi communal. La revisiun dil quen communal ei vegnida exequida dil biro ADDISSA SA, Glion ensemen cun la cumissiun da quen e gestiun. La revisiun constatescha ch'ils responsabels e funcziunaris administreschan cun senn da responsabladad il fatg communal. Bilanza e quen da menaschi corrispundan alla contabilitad ed als principis dil niev model da quen. Ils documents da fatschenta e contabilitad ein cumpletamein avon maun. Ils principis legals da valetaziun ein observai. Ulteriurs detagls vegnan dilucidai entras il president dalla cumissiun da quen e gestiun Andri Bearth.

Proposta

Sin fundament dil resultat dalla revisiun propona la cumissiun da quen e gestiun:

- a) d'approbar il quen communal ed il quen dalla meglieraziun funsila 2025 sco presentau a scret,
- b) d'approbar ils deposits en prefinanziaziuns da

- frs. 100'000.-- per l'introducziun dil cudisch funsil federal
- frs. 100'000.-- per la sanaziun plaz Cadruvi e nova tualetta publica, Rabiuis
- frs. 160'000.-- per la sanaziun Via Quadras Su, Sumvitg
- frs. 50'000.-- per la construcziun dalla Via Clavadi-Tuor, Sumvitg
- frs. 200'000.-- per la sanaziun dalla Via Marias, Rabiuis
- frs. 50'000.-- per il niev reservuar d'aua Chischnès
- frs. 400'000.-- per la sanaziun dalla Via Val (Runcahèz)
- frs. 150'000.-- per la sanaziun dalla Via Val (Acla Mulin)
- frs. 120'000.-- per il remplazzament d'ina maschina veglia
- frs. 400'000.-- per il project Lag Salischinas.

Sligiar prefinanziaziuns:

- frs. 100'000.-- sanaziun tegia d'alp Runé

- c) da dar scarica alla suprastonza, als ulteriurs organs responsabels ed all'administraziun ed admetter in cordial engraziament per lur engaschi en favur da nossa vischnaunca.

Discussiun

Ord il miez dalla radunonza communal vegn buca fatg diever dalla discussiun.

Decisiun

Las propostas dalla cumissiun da quen e gestiun vegnan sancziunadas. Il rendaquen communal 2025 vegn approbaus.

Resultat dalla votaziun:

Gie:	32	vuschs
Na:	0	vuschs
Abstenziuns:	0	vuschs

6. 1000.01 Tractaziun ed approvaziun dalla revisiun dil reglament da salarisaziun (DC 021.000)

Responsabel: President communal

Il reglament da salarisaziun communal digl onn 1998 e vegnius revedius per l'emprema gada igl onn 2013. Dapi quella midada ei il reglament buca pli vegnius adattaus. La cumissiun da quen e gestiun ha perquei inoltrau ils 3 da november 2025 ina interpellaziun alla suprastanza cun l'incarica da reveder il reglament da salarisaziun vertent. La raschun principala per quella revisiun ei ch'il reglament da salarisaziun actual correspunda buc pli allas pretensiuns dad oz. Aschia ei per exempel l'ulivaziun dalla carischia da 7.2 % (stan avrel 2026) buc vegnida adattada ils davos onns ed era la lavur supplementara dils organs communals ei buca risguardada commensuradamein. Plinavon duei cun ina revisiun vegnir scaffiu ina basa solida d'indemnizar la lavur dallas titularas ed dils titulars d'uffeci e garantir che quels uffecis sappien era egl avegnir vegnir occupai cun persunas qualificadas. Il medem mument duei il reglament ademplir ulteriuras finamiras, surtut ina harmonisaziun enteifer la regiun sco era la creaziun da structuras da basa modernas. Tenor la cumissiun da quen e gestiun ei actualmein da sentir ina aulta dinamica enteifer las autoritads communals. Ils commembers dallas autoritads s'engaschan cun gronda motivaziun e cuntentientscha per la vischnaunca, quei ch'ei da gronda impurtonza per siu svilup e quei duei era vegnir mantenu egl avegnir. Cun la revisiun duei perquei era vegnir dau in segn per rinforzar l'attractivitat dils uffecis communals. Gia oz ein biaras vischnauncas sut considerabla pressiun ed han pli e pli difficultads d'anflar candidatas e candidats adattai per uffecis publics.

Perquei ha la suprastanza communal decidu en sia seduta dils 12 da schaner 2026 da reveder il reglament da salarisaziun e ha perquei eligiù ina cumissiun cun ils commembers dalla cumissiun da quen e gestiun ed il canzlist communal. Tgamunada ei quella cumissiun vegnida dil president dalla cumissiun da quen e gestiun.

La suprastanza communal ha definiu las suandontas finamiras per mauns dalla cumissiun preparatorica:

- las indemnizaziuns dils organs communals duein vegnir harmonisadas enteifer la regiun,
- tuttas indemnizaziuns e spesas duein vegnir concepidas conform al temps,
- scaffir la basa legala per fuormas da lavur modernas, sco per exempel sedutas virtualas sco era lavurs independentas dil liug respectivamein mobilas.

L'emprema midada essenziala ei la denominaziun dil reglament. Quel vegn titlaus niev sco lescha da salarisaziun e buc pli sco reglament. Leschas vegnan approbadas dalla radunanza communal e reglaments dalla suprastanza communal. Perquei daventa ord il reglament da salarisaziun ina lescha da salarisaziun.

Adattaziuns essenzialas enviers il regulativ vegl

Per adattar las salarisaziuns da pauschalas e tariffas ha la cumissiun analisau e cumparegliau las leschas dallas vischnauncas dalla regiun. Cheutras eis ei semussau ch'ina gronda part dallas pauschalas d'indemnizaziun per la suprastanza communal da nossa vischnaunca semova sut il nivel regional. Sebasond sin quellas constataziuns ha la cumissiun preparatorica proponiu ils suandonts puncts.

President communal

Il president communal duei egl avegnir buca pli vegnir indemnizaus cun ina pauschala fixa mobein survegnir ina paga tenor la classificaziun da paga dil cantun Grischn. Quei model correspunda ad ina pratica moderna che vegn gia applicada en differentas vischnauncas dil cantun Grischn sco era enteifer la Cadi. La cumissiun propoia da definir pil parsura communal la classa da paga 23, scalem 1 dalla scala da pagas dil cantun Grischn. L'adattaziun dalla paga duei buca vegnir adattada mintg'onni in scalem mobein per mintga legislatura. Concret s'augmenta la paga da basa mintga treis onns per dus scalems tenor la scala da pagas dil Grischn entochen ch'il scalem maximal dalla classa 23 ei contonschius. En cumparegliaziun cun l'indemnizaziun pauschala actuala da 55'000.-- francs annual vegn il parsura communal en l'emprema legislatura daniev indemnizaus tenor la classa 23, scalem 1, tier in pensum da lavur da 50 % cun ina paga da 64'447.50 francs. Subtrahau la carischia da 7.2 % ei quei in augment da paga da 5'487.50 francs.

Sper l'adattaziun dalla paga ha la cumissiun proponiu alla suprastanza communal d'augmentar il pensum da lavur dil president communal dad actual 50 % sin niev 60 % d'in pensum cumplein. En sia emprema perioda d'uffeci ha il president communal cun in alzament dil pensum da lavur sin 60 % ina paga annuala da 77'337.-- francs.

L'indemnisaziun cumpeglia tuttas sedutas ordinarias sco era tuttas lavurs en connex cun ils fatgs communal. La cumpensaziun dalla carischia succeda annualmein tenor las prescripziuns respectivamein tenor las calculaziuns dalla regenza grischuna. La pauschala da spensas resta sco tochen dacheu sin 2'000.-- francs. Quella pauschala cuviera tuttas spensas che sedattan enteifer la vischnaunca.

Ulteriura suprastanza

Las scheffas ed ils schefs da departament duein vegnir indemnissai vinavon cun ina pauschala annuala per lur activitad generala. Quella munta da niev a 10'000.-- francs ad onn, quei che correspunda ad in augment da 1'500.-- francs enviers il reglament d'entochen ussa. Cun quella pauschala generala vegnan specialmein las suandontas lavurs indemnissadas:

- lavurs da preparaziun per las sedutas da suprastanza, en special preparar las tractandas, collaborar tier l'elavuraziun da messadis, preparar sin las sedutas e la participaziun allas seduta da suprastanza communal
- separticipar a radunonzas communalas sco era tenor basegns lavurs da preparaziun correspundentas
- lavurs en connex cun quen annual, plan da finanzas e preventiv, en special organisar material da cefras sco era redeger texts
- simplas lavurs organisaziun, sclariments d'informaziun, per exempel informar e surdar incaricas ni coordinar termins
- visar quens sco era suttascriber brevs, contracts e lubientschas
- tuttas sesidas da preparaziun en connex cun las incumbensas suranumnadas

Buca cunteni ella pauschala dils commembers dalla suprastanza communal ein en special:

- uatgas cun convischinas e convischins
- collaudaziuns e visetas sin piazzals el rom da projects
- lavurs da redacziun da messadis per radunonzas communalas respectivamein votaziuns all'urna

Sedutas e lavur extraordinaria enteifer il temps da lavur usitau che crodan buca sut las activitads suranumnadas vegnan indemnissadas separadamein tenor igl artechel 3 e quei sequentamein cun 50.-- francs per ura, denton maximalmein cun 400.-- francs per di. Supplementarmein vegn la pauschala da spensas annuala augmentada per 500.-- francs sin niev 2'000.-- francs.

Cumissiuns e lur lavurs extraordinarias

Sin fundament dalla complexitad dalla tematica sil sector da baghegiar duei l'indemnisaziun annuala dil president dalla cumissiun da baghegiar vegnir augmentada. Daniev ei previu ina paga annuala da denter 3'500.-- e 5'000.-- francs. La pauschala vegn fixada annualmein dalla suprastanza communal en rama dil preventiv communal. Tier il president dalla cumissiun da quen e gestiun stat la pauschala sco tochen dacheu. Ils ulteriurs commembers dalla cumissiun da baghegiar sco era dalla cumissiun da quen e gestiun vegnan daniev indemnissai cun ina summa pauschala da 200.-- francs.

Tier las ulteriuras cumissiuns datei buc midadas essenzialas. En connex cun la cumpensaziun dalla carischia duein denton las indemnisaziuns per lavurs extraordinarias e sedutas vegnir adattadas. Da niev vala – analog alla suprastanza communal, alla cumissiun da quen e gestiun sco era alla cumissiun da baghegiar – ina tariffa per ura da 50.-- francs (vegl 40.-- francs), nua che l'indemnisaziun ei limitada a maximalmein frs. 400.-- per di. Sedutas extraordinarias vegnan indemnissadas da niev cun ina pauschala da 60.-- francs (vegl 50.-- francs).

Survesta dalla midadas denter il reglament vegl e la lescha nova

	tariffas actualas	tariffas novas
art. 3 – Indemnizaziun per sedutas e lavur extraordinaria		
sedutas e lavur extraordinaria enteifer il temps da lavur usitau	per ura frs. 40.--	per ura frs. 50.--
sedutas e lavur extraordinaria ordeifer il temps da lavur usitau	per seduta frs. 50.-- per lavur frs. 25.-- per ura	per seduta frs. 60.-- per lavur frs. 50.-- per ura
daner da protocol	frs. 50.--	frs. 60.--
lavor cumina	frs. 25.-- per ura	frs. 25.-- - 30.-- per ura
President communal		
salarisaziun	pauschal frs. 55'000.-- (pensum da 50 %)	classe 23, scalem 1 (pensum da 60 %)
spesas pauschalas	frs. 2'000.--	frs. 2'000.--
Gerauas e geraus		
salarisaziun fixa	frs. 8'500.--	frs. 10'000.--
spesas pauschalas	frs. 1'500.--	frs. 2'000.--
Lavor extraordinaria e supplementara	tenor art. 3	tenor art. 3
Cumissiun da quen e gestiun		
salarisaziun president	frs. 2'500.--	frs. 2'500.--
ulteriurs commembers	--	frs. 200.--
lavor extraordinaria e supplementara	tenor art. 3	tenor art. 3
Cumissiun da baghegiar		
salarisaziun president	frs. 3'500.--	frs. 3'000.-- – frs. 5'000.--
pauschala da spesas president	frs. 1'000.--	frs. 1'000.--
ulteriurs commembers	--	frs. 200.--
lavor extraordinaria e supplementara	tenor art. 3	tenor art. 3
Cumissiuns permanentas ed ulteriuras cumissiuns		
lavor extraordinaria e supplementara	tenor art. 3	tenor art. 3

Sper l'adattaziun dallas tariffa preveda la revisiun parziala dil reglament da salarisaziun egl art. 15 l'ulivaziun dalla carischia mintga tschun onns independent digl augment. Quell'ulivaziun succeda entras l'executiva communal.

Resumaziun dalla revisiun

All'entschatta dil process da reveder il reglament da salarisaziun ha la suprapostanza communal definìu treis finamiras. Da quellas ha la cumissiun preparatorica saviu ademplir las duas finamiras principalas. La tiarza finamira duei vegnir ademplida entras ina revisiun parziala dil reglament da fatschenta (DC 020.000) che vegn approbaus dalla suprapostanza communal. La suprapostanza communal engrazia alla cumissiun preparatorica cun siu tgamun Andri Bearth per la lavur prestada e per las discussiuns intensivass durant il process d'elaboraziun.

Il parsura communal passa artechel per artechel dalla lescha ed explichescha tuts detagls. Igl artechel 8 che pertucca il president communal vegn presentaus dil president dalla cumissiun da quen e gestiun Andri Bearth.

Discussiun

Art. 1-7 vegn buc fatg diever dalla discussiun.

Art. 8 President communal

Convischin Rest Andriu Bearth constatescha che la paga nova dil parsura communal ei sulettamein menziunada el text da Las Squadras e buca en la tabella sco survesta. Convischin Bearth propona alla radunanza communal las suandontas quater propostas e pretenda da far per mintga proposta scrutini:

1. Il temps d'engaschament dil president communal duei restar sco tochen dacheu sin 50 % e buc vegnir alzaus sin 60 %.
2. L'indemnisaziun dil president communal duei succeder tenor la classa 23, scalem 1 e restar adina sin il medem scalem da paga senza in'adattaziun dil scalem suenter mintga perioda d'uffeci.
3. Tuttas indemnisaziuns per mandats ufficials en num dalla vischnaunca van en cassa communal. La formulaziun duei restar sco tochen dacheu.
4. En cass specialas sa la suprapostanza communal ensemen cun la cumissiun da quen e gestiun fixar ina salarisaziun speciala pil president communal. Quella semova denter 40 % e 60 % d'ina piazza parziala. La formulaziun duei restar sco tochen dacheu.

Plinavon damonda convischin Gieri Duff il motiv daco che mintga president communal vegni indemnissaus tuttina, independent dallas qualificaziuns persunalas, numnadamein en l'emprema perioda ella classa 23, scalem 1. Aschia vegni buca risguardau l'esperienza dalla persuna sco quei ch'ei seigi la practica tier il cantun Grischun.

Il parsura communal menziunescha ch'ei seigi grev da definir l'esperienza dalla singula persuna e che consequentamein fuss in eventual conflict pusseivels denter parsura ed il gremi che havess da decider respectiv da definir il scalem da paga dil parsura. En consequenza stuess la decisiun vegnir prida entras la suprapostanza communal ensemen cun la cumissiun da quen. Quella pusseivladad per in conflict han ins sapientiv vuliu evitar.

Ulteriuras discussiuns tier igl art. 8 vegn buc giavischadas.

Decisiuns concernent las propostas tier igl art. 8

1. Proposta: Il temps d'engaschament dil president communal duei restar sco tochen dacheu sin 50 % e buc vegnir alzaus sin 60 %.
Per sustener la proposta da convischin Bearth ei da votar gie; per sustener la proposta dalla suprapostanza communal na.

Resultat dalla votaziun:

Cedels reparti:	32
Cedels rimnai:	32
Cedels nunvaleivels:	1
Cedels vits:	0
Cedels valeivels:	31
Gie:	11
Na:	20

La proposta da convischin Bearth vegn refusada.

2. Proposta: L'indemnisaziun dil president communal duei succeder tenor la classa 23, scalem 1 e restar adina sin il medem scalem da paga senza in'adattaziun dil scalem suenter mintga perioda d'uffeci.

Per sustener la proposta da convischin Bearth ei da votar gie; per sustener la proposta dalla suprastonza communal na.

Resultat dalla votaziun:

Cedels reparti:	32
Cedels rimnai:	32
Cedels nunvaleivels:	1
<u>Cedels vits:</u>	<u>0</u>
Cedels valeivels:	31
Gie:	13
Na:	18

La proposta da convischin Bearth vegn refusada.

3. Proposta: Tuttas indemnisaziuns per mandats ufficials en num dalla vischnaunca van en cassa communal. La formulaziun duei restar sco tochen dacheu.

Per sustener la proposta da convischin Bearth ei da votar gie; per sustener la proposta dalla suprastonza communal na.

Resultat dalla votaziun:

Cedels reparti:	32
Cedels rimnai:	32
Cedels nunvaleivels:	1
<u>Cedels vits:</u>	<u>0</u>
Cedels valeivels:	31
Gie:	15
Na:	16

La proposta da convischin Bearth vegn refusada.

4. Proposta: En cass specials sa la suprastonza communal ensemen cun la cumissiun da quen e gestiun fixar ina salarisaziun speciala pil president communal. Quella semova denter 40 % e 60 % d'ina piazza parziala. La formulaziun duei restar sco tochen dacheu.

Per sustener la proposta da convischin Bearth ei da votar gie; per sustener la proposta dalla suprastonza communal na.

Resultat dalla votaziun:

Cedels reparti:	32
Cedels rimnai:	32
Cedels nunvaleivels:	1
<u>Cedels vits:</u>	<u>0</u>
Cedels valeivels:	31
Gie:	13
Na:	18

La proposta da convischin Bearth vegn refusada.

Art. 9-17 vegn buc fatg diever dalla discussiun.

Proposta

La suprastonza communal propoia alla radunonza communal d'approbar la revisiun dil reglament da salarisaziun (DC 021.000) sco presentau.

Decisiun

Quella votaziun finala succeda medemamein en scrutini.

Resultat dalla votaziun:

Cedels reparti:	32
Cedels rimnai:	32
Cedels nunvaleivels:	0
Cedels vits:	0
Cedels valeivels:	32
Gie:	25
Na:	7

La radunonza communal sancziunescha la proposta dalla suprastanza communal ed approbescha la revisiun dil reglament da salarisaziun (DC 021.000) senza midadas.

7. 0110.02 Orientaziuns

Gerau Meinrad Degonda orientescha la radunonza davart ils suandonts fatgs:

- sur dil project dalla seiv gronda a Puzzastg: Las lavurs vida la seiv gronda a Puzzastg vegnan bein vinavon. Il mument ein dapli che 3/4 finidas e la seiv vegn serrada aunc en il decuors dalla stad 2026.

Gerau Diego Deplazes orientescha la radunonza davart ils suandonts fatgs:

- sur dalla sanaziun scola Rabiis: Las lavurs principalas succedan uss cun l'entschatta dallas vacanzas da stad 2026. Surtut las lavurs grondas san era caschunar in cert disturbi da canera e traffic. Plinavon sa gerau Deplazes orientar sur dalla colur nova dallas fatschadas dalla scola che vegn ad esser tenor il giavisch dils affons, verda.

Il parsura communal orientescha la radunonza davart ils suandonts fatgs:

- sur dalla reorganisaziun digl uffeci da baghegiar. Per vegnir da far frunt allas pendenzas tier igl uffeci da baghegiar ha la suprastanza communal decidu duas mesiras. La suprastanza communal ha decidu da reorganisar igl uffeci da baghegiar. Cun l'elecziun dil niev incumbensau ei l'emprema mesira gia vegnida realisada. La secunda mesira vegn ad entrar en vigur miez fenadur cun la surdada dall'administraziun dil biro digl uffeci da baghegiar ad interim alla firma specialisada Curia SA, nua ch'igl anteriur canzlist communal Fabian Collenberg ei engaschaus. Igl engaschi temporar da Curia SA duei dar il sustegn necessari tier la reorganisaziun, l'integrasiun e scolaziun dil niev collaboratur digl uffeci da baghegiar e garantir ina buna surdada dallas incumbensas.

8. 0110.02 Varia

Convischin Rest Andriu Bearth seperstgisa che la radunonza ei ida muort ils scrutinis ina mesa ura pli ditg, denton muossa igl exempel che leschas san vegnir revedidas. Perquei vul convischin Bearth ch'ei vegn fatg ponderaziuns co midar la lescha da traffic per vegnir da megliurar la situaziun da semenar en ils quartiers sco p.ex. en il quartier nua ch'el habiteschi a Cavischlè. Leu seigi la situaziun ch'ils luvvers communal fetschien diever d'in plaz privat per saver semenar alla fin dalla via da quartier. Cunquei che la geraua responsabla Cornelia Cathomas ei oz muort malsogna absenta pren il parsura communal encunter il giavisch. La corrispundenta orientaziun succeda a caschun d'ina proxima radunonza communal.

Convischin Erwin Gienal fa attents che la vischnaunca da Sumvitg, denton cunzun il vitg da Sumvitg ha memia paucs parcadis. El giavischa che la suprastonza communal fetschi ponderaziuns co augmentar il diember da parcadis per aschia levgiar il parcar a Sumvitg. Il parsura communal pren encunter il giavisch e vegn ad orientar a caschun d'ina proxima radunonza communal.

Avon che terminar la radunonza engrazia il president communal per la preschientscha alla radunonza da vischnaunca. El giavischa a tuts in bi temps da stad, bialas vacanzas e spera da seveser cun ina gronda raspada tier la proxima radunonza communal. Cun quels plaids declara el la radunonza per serrada.

7175 Sumvitg, 15-06-2026

Fin dalla radunonza allas 22.00 uras

Il president communal

Igl actuar communal

Patrick Schaniel

Gionduri Maissen